

Kommunit aqunneqarnerat pillugu Inatsisartut inatsisaat

Kapitali I

Aalajangersakkat nalinginnaasut

§ 1. Kommunip susassaqaarfiini kommunalbestyrelsi aqutsisuuvoq.

Imm. 2. Kommunilbestyrelsip kommunip aqunneqarneranut malittarisassat erseqqinnerusut, tassunga ilanngullugit borgmesterip suliaassaqaarfiinut maleruagassat, aqutsinermut ileqqoreqqusami aalajangersassavai. Aqutsinermut ileqqoreqqusassamut siunnersuutit aamma ileqqoreqqusamut atuuttumut allannguutissatut siunnersuutit kommunalbestyrelsimi minnerpaamik ullunik 14-inik akuttussuseqartumik marloriarlugit suliarineqassapput.

Imm. 3. Kommunilbestyrelsip suleriaasissani nammineq aalajangersassavaa.

Imm. 4. Kommunilbestyrelsip kommunimi aqutsinermut ileqqoreqqusaq suleriaasissamullu aalajangersakkap assinga Naalakkersuisunut nassiutissavai.

Imm. 5. Naalakkersuisut aqutsinermut ileqqoreqqusamik nalinginnaasunik aamma suleriaasissamut maleruagassamik suliaqassapput, kommunalbestyrelsimi allatut aalajangersaasoqarsimatinnagu malinneqartussaasumik aamma maleruagassat qanoq paasineqarnissaannik nalornisoortoqartillugu tunngavigineqartussanik.

§ 2. Kommunip ilisarnaataa kommunimi pineqartumi oqartussaasut kisimik atugassaraat. Taamaattoq ilisarnaatip atorneqarnissaanut qinnuteqartoqartillugu pinerit tamaasa allat ilisarnaammik atuisinnaanerannut kommunalbestyrelsi akuersisinnaavoq. Ilisarnaatip aningaasarsiutitut atorneqarnissaanut akuersineq sullissinermut akiliuteqarnissamik piumasaqaammik ilaqartinneqarsinnaavoq.

Kapitali 2

Kommunalbestyrelsi

Kommunalbestyrelsip katitigaanera il.il.

§ 3. Kommune Kujallermi (kujataa) aamma Qeqqata kommuniani (qeqqa) kommunalbestyrelsit 15-inik ilaasortaqaarput. Qaasuitsup kommuniani (avannaa) aamma Kommuneqarfik Sermersoorumi (kangia/kitaa) kommunalbestyrelsit 21-inik ilaasortaqaarput.

Imm. 2. Kommunilbestyrelsinut ileqquusumik qinersinissanut ukioq qinersiviusussaq ukiumik sioqqullugu kommunalbestyrelsit aalajangersinnaavaat Kommune Kujallermi aamma Qeqqata Kommuniini 15-init ikinnerusunik ilaasortaqaarnissaa, aammalu Qaasuitsup Kommuniani kiisalu Kommuneqarfik Sermersuumi

ilaasortat 21-init ikinnerunissaat. Ilaasortat amerlassusissaat akunnattuusussaq aqutsinermut malittarisassani aalajangersarneqassaaq.

§ 4. Kommunalbestyrelsi qinigaarlaaq qinigaanerup kingorna inissitiserluni ataatsimiissaaq qinersinermi ataatsimiititaliami qinersineq pillugu maalaarutaasimasinnaasunik aammalu ilaasortanngortut qinigaasinnaanerat pillugu naliliisoqareeraangat. Ataatsimiigiaqqusineq allaganngorlugu kommunalbestyrelsimi sivisunerpaamik ilaasortaasimasumit isumagineqassaaq, sivisunerpaamillu ilaasortaasimasut arlaqarpata, taava taakkua angajullersaannit.

Imm. 2. Borgmesterimik qinersisoqareernissaanut kommunalbestyrelsip isumaqatigiinniarnera ilaasortamit ataatsimiigiaqqusimasumit isumagineqassaaq, imaluunniit taanna peqanngippat sivisunerpaamik ilaasortaasimasumit, taakkualu arlaqarpata, angajullersaannit.

§ 5. Kommunip allaffissornikkut suliaasaataasa aaqqissuunneqarnissaat aammalu kommunaldirektørimik atorfinitsitsisarneq soraarsitsisarnerlu kommunalbestyrelsip akisussaaffigai.

Borgmesterimik borgmesterillu tullianik qinersineq

§ 6. Kommunalbestyrelsip inissitiserfusumik ataatsimiinnermini aallaqqaasiullugu borgmesteri akunnerminit qinissavaa.

Imm. 2. Qinigassanngortittoq borgmesteritut qinigaassaaq taasisut affaannit amerlanerusunit qinerneqaruni (amerlanerussuteqavinneq). Qinigassanngortittuni amerlanerussuteqartoqanngippat nutaamik taasisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata makitsinikkut aalajangerneqassaaq.

Imm. 3. Borgmesterimik qinersisoqareerpat kommunalbestyrelsi akunnermini borgmesterip tullianik qinersissaaq, borgmesterip pisinnaannginnerani kingoraartaasartussamik. Qinersineq borgmesterimik qinersinermi maleruagassat atuuttut naapertorlugit ingerlanneqassaaq, borgmesterinngortumillu qinersineq siulersorneqassalluni imaluunniit taanna pisinnaanngippat ilaasortamit borgmesterimik qinersinermi siulersuisuusimasumit.

Imm. 4. Aqutsinermut malittarisassami aalajangersarneqarsinnaavoq kommunalbestyrelsi ilaasortami akornanni qinersissasoq borgmesterip tullissaanik siullermik aappaanillu, taaneqartutut tulleriinneqarlutik borgmesterip pisinnaannginnerani kingoraartaasartussanik. § 35 naapertorlugu qanoq amerlassuseqarneq tunngavigalugu qinersineq ingerlanneqassaaq.

Imm. 5. Borgmesterimik aamma borgmesterip tullianik qinersineq kommunalbestyrelsip piffissami qinigaaffiani atuutissaaq.

§ 7. Kommunalbestyrelsimi ilaasortaq kinaluunniit pisussaavoq borgmesterimut imaluunniit borgmesterip tullianut qinerneqarnerminik akuersissalluni.

Imm. 2. Qinnuteqartoqarneratigut kommunalbestyrelsip borgmesteri aamma borgmesterip tullia piffissap qinigaaffiup sinnerani atuukkunnaarsissinnaavai.

Imm. 3. Borgmesteri imaluunniit borgmesterip tullia akuerineqarluni atorfimminiit tunuarpat, toquppat imaluunniit kommunalbestyrelsimi tunuarpat nutaamik qinersineqassaaq malittarisassat § 6-imiittut naapertorlugit, kommunalbestyrelsip piffissami qinigaaffiata sinnerani atuuttussamik. Borgmesterip tullii marluk qinerneqarsimappata inissaq inuttaaruttoq kommunalbestyrelsimi gruppimit toqqaasimasunit inuttalernerneqassaaq.

*Kommunalbestyrelsip ataatsimiittarneri, suliamut attuumassuteqarnermi aalajangeeqataasinnaannginneq
aammalu peqanngittarneq*

§ 8. Kommunalbestyrelsi aalajangiisassaaq qaqugu sumilu ileqquusumik ataatsimiinnerit ingerlanneqartassanersut. Tamanna kommunimi periaaseq naapertorlugu tamanut tusarliunneqartassaaq ukiut naatsorsuiffiit aallartinneri tamaasa, tamannalu pillugu Naalakkersuisut ilisimatinneqassapput.

Imm. 2. Ukiuni kommunalbestyrelsimut nutaamik qinersiffiusussani ileqquusumik ataatsimiinnissat ullussaat aalajangersarneqartassapput taamaallaat qaammatip kommunalbestyrelsip atuuttup tunuarfissaata naaneranut. Kommunalbestyrelsip qinigaarlaap inissitsiterluni ataatsimiinnermini ukiup sinnerani ileqquusumik ataatsimiittarnissat ullussaat aalajangersassavai.

Imm. 3. Immikkut ittunik ataatsimiinneqartassaaq borgmesterip pisariaqartuutikkaangagu imaluunniit ikinnerpaamik ilaasortat pingajorarterutaasa tamanna piumasarigaangassuk. Borgmesterip aalajangertassavaa immikkut ittumik ataatsimiinnissat qaqugu sumilu pinissaat. Sapinngisamik sioqqutsisumik kommunimi innuttaasut Naalakkersuisullu nalunaarfigineqassapput.

Imm. 4. Borgmesterip sapinngisamik kingusinnerpaamik kommunalbestyrelsip ataatsimiilernissaa ulluinnarnik sisamanik sioqqullugu ullormut oqaluuserisassat allassimaffiat kommunalbestyrelsimi ilaasortanut nassiuttassavaa, kiisalu sapinngisamik kingusinnerpaamik ataatsimiinnissaq ullunik pingasunik sioqqullugu suliat paasissutissallu ullormut oqaluuserisassani suliasat nalilernissaannut atorineqartussat nassiunneqassapput. Kommunalbestyrelsimi ilaasortat inatsisit naapertorlugit nipangiussisimasussaatitaanermut maleruagassiat killissarititaasa iluanni suliasat kommunalbestyrelsimi oqaluuserineqartussat inuit kommunalbestyrelsimi ilaasortaanngitsut peqatigalugit misissorlugit aqqusaartornissaannut pisinnaatitaapput.

Imm. 5. Kommunalbestyrelsip ataatsimiinnerani suliasanut oqaluuserineqartussanut takussutissiaq aammalu aalajangiinernut imaqarniliaq, inatsisit naapertorlugit nipangiussisimasussaatitaanermut maleruagassiat killissarititaat killigalugit, kommunimi sumiiffimmi ataatsimi arlalinniluunniit saqqummiunneqassapput.

§ 9. Kommunalbestyrelsip ataatsimiinneri tamanut ammasuupput. Taamaattoq kommunalbestyrelsip akuersissutigisinnaavaa suliasat ataasiakkaat matoqqasumik oqaluuserineqarnissaat suliasap qanoq issusia pissutigalugu tamanna pisariaqartinneqaraangat. Suliasap matoqqasumik oqaluuserineqarnissaanut tunngavissaqarnerseq pillugu apeqqut matoqqasumik oqaluuserineqassaaq tamanna kommunalbestyrelsimi imaluunniit borgmesterimit aalajangerneqarpat.

Imm. 2. Kommunalbestyrelsip inuit kommunimi atorfeqartut akuerisinnaavai suliasat matoqqasumik oqaluuserineqarnerat najuuffigisinnaagaat. Suliasap matoqqasumik oqaluuserineqarnerani inuit allat kommunalbestyrelsip aggeqqusinnaavai suliasap nassuiarneqarnissaa pissutigalugu tamanna kissaatiginarpat.

Imm. 3. Nipangiussisimasussaatitaaneq Kalaallit Nunaanni Pinerluttulerinermut inatsit naapertorlugu kommunini matoqqasumik ataatsimiinnerni peqataasunut tamanut atuuppoq.

Imm. 4. Naalakkersuisut sinniisaat pisinnaatitaavoq suliasat matoqqasumik oqaluuserineqarneranni najuutissalluni.

§ 10. Immikkut allamik aalajangigaqartoqarsimanngippat suliasap akuersissutigineqarnissaani kommunalbestyrelsimi ataasiaannarluni oqaluuserinninneq pisariaqarpoq.

§ 11. Kommunalbestyrelsi aalajangiisinnassuseqarpoq ikinnerpaamik ilaasortat affaat ataatsimiinnermi najuuppata. Allamik immikkut aalajangigaqartoqarsimanngippat taasisut amerlanerussuteqarnerisigut aalajangiineqartassaaq.

Imm. 2. Ilaasortaq ataatsimiinnermi peqataasinnaavoq oqarasuaatikkut imaluunniit videokonference telefax-iluunniit atorlugu, ilaasortap piumasaqaatit § 15, imm. 1-imi allassimasut naammassisinnaappagit, aammalu sinniisussamik aggersaasoqarsinnaappat.

Imm. 3. Kommunalbestyrelsip suleriaatsimut maleruagassamini aalajangersarsinnaavaa ataatsimiinnerit oqarasuaatikkut videokonference-tut telefax-ikkulluunniit ingerlanneqarsinnaasut, aammalu attaveqaateqarnikkut periarfissat allat atorneqarsinnaasut.

§ 12. Kommunalbestyrelsimi ilaasortaq kinaluunniit qinikkatut sulinerminut atatillugu suliassap aalajangersimasup taamatut isikkoqarluni inerneranik kommunip allaffeqarfiani inissisimasumik misissuilluni aqqusaartuisinnaatitaavoq.

Imm. 2. Suliamik takunnikkumanermik piumasaqaat imm. 1 naapertorlugu saqqummiunneqartoq borgmesterimut ingerlatinneqassaaq.

Imm. 3. Borgmesterip suliamut tunngasumik takunnissinnaanerup annertussusissaa killilersinnaavaa, suliap sularineqarnerata tamanna pisariaqartippagu, imaluunniit takunnissinnaatitaaneq pissusissamisuunngitsumik ajornartorsiortitsilersinnaappat.

Imm. 4. Kommunalbestyrelsimut ilaasortaq kinaluunniit qinnuteqarnini naapertorlugu suliamut aalajangersimasumut tunngasumi suliap assinganik nassinneqarsinnaavoq, imm. 1-3-mi periarfissamik atuinermini. Kommunalbestyrelsili erseqqinnerusunik maleruagassiorsinnaavoq suliamut tunngasunik paasissutissanik nassinneqarsinnaanermut tunngatillugu, tamanna pisariaqartinneqarpat.

§ 13. Kommunalbestyrelsimi ilaasortap kialuunniit kommunip susasaqarfii pillugit apeqqutit suulluunniit kommunalbestyrelsimut saqqummiussinnaavai aammalu tamakku pillugit aalajangiinissanut siunnersuutininik saqqummiussisinnaalluni. Ataatsimiititaliat borgmesterilu paasissutissanik taassuma piumasaanik, kommunalbestyrelsillu aalajangernissanut inatsisitigut aalajangersakkat qaqugukkulluunniit malinneqartussaataasut pillugit kommunalbestyrelsimut nalunaaruteqassapput.

§ 14. Ilaasortat ilaat suliassami aalajangersimasumi inuttut ima soqutigisaqartiginersoq suliassaq taanna pillugu kommunalbestyrelsip oqaluuserinninnerani taasineranilu peqataanngitsoortariaqarnersoq kommunalbestyrelsip aalajangiiffigissavaa.

Imm. 2. Ilaasortap pissutsinik suliassanilu aalajangersimasuni inuttut soqutigisaqarnini pissutigalugu ataatsimiissutiginninnerni taasinernilu peqataasinnaanerminut nalornisoornartoqartillugu kommunalbestyrelsi ilisimatissavaa.

Imm. 3. Ilaasortaq suliassamut tunngasumi aalajangeeqataasinnaanngitsutut oqaatigineqartariaqartoq ilimanarsippat ilaasortat pineqartoq qinigassanngorteqatigalugu qinigaasimasut, aamma kisimiillutik qinigassanngortissimasut, piumasarisinnaavaat suliassap oqaluuserineqarnissaani pineqartup sinniisussaata peqataatinneqarnissaa.

Imm. 4. Kommunalbestyrelsi aalajangiissappat ilaasortaq suliassamut attuumassuteqarluni aalajangeeqataasinnaanngitsoq, taassumalu sinniisussaa ataatsimiigiaqquneqanngippat, ilaasortat pineqartumut qinigassanngorteqataasimasut, pineqartorlu kisimiilluni qinigassanngortittuusimappat ilaasortap nammineq piumasarisinnaavaa suliassap tullianik ataatsimiinnissamut kinguartinneqarnissaa. Taamaattoq kinguartitsisoqarsinnaanngilaq ilaasortat najuuttut 2/3-sa tamanna akerlerippassuk,

imaluunniit kinguartitsinissap nassatarissappagu piffissarititaasut kommunip malissallugit pisussaaffii qaangerneqassappata.

§ 15. Ilaasortaq kommunalbestyrelsip ataatsimiinnissaani napparsimanini, naartunini, erninini, meeravissiartaarnini, inuiaqatigiinni sullissisusaatitaalluni pisussaaffiligaanini, inuutissarsiutini assigisaalluunniit pissutigalugit ataatsimeeqataasinnaajunnaarpat ilaasortap pisinnaanngitsup qinigaaqatigisimasaasa, aamma kisimiillutik qinigassanngortissimasut, piumasarisinnaavaat sinniisussap ataatsimiigiaqquneqarnissaa. Inissititserfusumik ataatsimiinnermi, imaluunniit aningaasartuutissanut missingersuutit aappassaaneerreqarnerannut atatillugu, sinniisussap ataatsimiigiaqquneqarnissaa piumasarineqarsinnaavoq allamik peqquteqarluni ilaasortaq ataatsimeeqataasinnaanngippat. Qinigassanngorteqatigiinni ilaasortamik qinikkamik ataatsimiigiaqqusinissamik piumasaqaateqartoqarsinnaanngippat sinniisussap nammineq piumasaqaatigisinnaavaa ataatsimiigiaqquneqarnissani.

Imm. 2. Ilaasortaq imm. 1-imi taagorneqartuni patsiseqarluni piffissami qaammatinik marlunnik sivilisunerusumik anisariaqaleruni taava borgmesterimut allakkatigut taamatut iliorliarluni nalunaaruteqassaaq. Borgmesterip sinniisussaq kommunalbestyrelsip ataatsimiinnissaanut tulliuuttumut siullermut ataatsimiigiaqqussavaa.

Imm. 3. Kommunalbestyrelsip aalajangissavaa ilaasortap anigallarnissaanut aammalu sinniisussap isernissaanut piumasaqaataasut eqqortinneqarnersut.

Imm. 4. Ilaasortap kommunimi pisussaaffini suliareqqissinnaalerpagit sinniisussaq kommunalbestyrelsimit tunuassaaq.

Imm. 5. Borgmesterip imaluunniit borgmesterip tulliaata sinniisussaa imm. 2-mi maleruagassat naapertorlugit isertinneqarpat, pineqartullu pisinnaanngikkallarnera sivilinnerpaamik qaammatinik sisamanik sivilisussuseqarpat § 6-imi maleruagassat malillugit kommunalbestyrelsip toqqassavaa borgmesteritut imaluunniit borgmesterip tulliatut isumagisassanik isumaginnittussaq.

§ 16. Kommunalbestyrelsip aalajangiineri allanneqassapput aalajangiinernut imaqarniliami ataatsimiinnerit kingornatigut ilaasortanit ataatsimiinnermi najuuttunit atsiorneqartussami. Ilaasortani taakkunani kinaluunniit piumasaqarsinnaavoq isummani allaasoq naatsumik imaqarniliami allanneqaqqullugu, sulianilu pisortatut oqartussaasunut allanut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaat. Ilaasortap taassuma suliaq nassiinneqarnerani suliaq ilaqartissinnaavaa nammineq isummaminut tunngavilersuutigisaminik.

Imm. 2. Borgmesterip isumannaassavaa aalajangiinernut imaqarniliap ataatsimiinnermi peqataasunit atsiorneqarnissaa, aamma matoqqasumik ataatsimiinnermi sammineqartut ilanngullugit.

Imm. 3. Ilaasortat § 11, imm. 2 malillugu peqataasut atsiorsinnaapput attaveqatigiinnermi teknologii atorlugu.

Imm. 4. Imaqarniliap atsiorneqarnerata kingorna kingusinnerpaamik qaammatip ataatsip qaangiunnerani imaqarniliap nuutinnera borgmesterip Naalakkersuisunut nassiutissavaa.

Kapitali 3

Borgmesterip borgmesterillu tulliaata sulinerat

§ 17. Borgmesterip kommunalbestyrelsip ataatsimiinnissai piareersartassavai kommunalbestyrelsimilu ilaasortat ataatsimiigiaqqusarlugit. Borgmesterip kommunalbestyrelsip ataatsimiinneri taasinerilu siulersortassavai aalajangiisarnerillu imaqarnilianut allattaavinnut allanneqarnissaat isumagissallugu.

§ 18. Borgmesterip kommunalbestyrelsi sinnerlugu suliassat kinguartinneqarsinnaanngitsut imaluunniit nalornisoorutaasinnaanngitsut aalajangiivigisinnaavai.

Imm. 2. Borgmesterip kingusinnerpaamik ileqquusumik ataatsimiinnermi tulluuttumi suliat imm. 1 naapertorlugu aalajangiiffigineqartut pillugit kommunalbestyrelsi ilisimatittassavaa.

§ 19. Borgmesterip kommunip ulluinnarni allaffissornikkut aqunneqarnera isumagissavaa, suliassat ataatsimiititalianut ataavartunut ingerlateqqittarlugit, kiisalu suliassat kommunalbestyrelsimit aalajangiiffigisariaqartut aalajangiiffigineqarnissaannut naammattumik qulaajarneqarsimanissaat isumagisarlugu. Borgmesterip suliat suliarineqarnerat nakkutigissavaa, pisariaqartumillu ilitersuusiornissat aaqqissuutissallugu.

Imm. 2. Borgmesterip isumagissavaa aningaasartuuteqartoqaranilu isertitaqartoqassanngitsoq pisariaqartumik akuersissummik peqartoqartinnagu.

§ 20. Borgmesteri ilaasortaanngikkaluarluni ataatsimiititaliat ataavartut il.il. isumaqatigiinniarnerni peqataasinnaavoq, taaseqataasinnaanani. Borgmesteri ataatsimiititaliat qaqugu ataatsimiinnissaannik oqaluuserisassallu allassimaffiannik ilisimatinneqartassaaq, aamma ataatsimiinnerit tamarmik imaqarniliorneqarnerata assinganik.

Imm. 2. Borgmesterip ataatsimiititaliat marluk amerlanerilluunniit ilaasortaat katersortissinnaavai, suliassani ataatsimut soqutiginaateqartuni oqaloqatigiissuteqarnissaq siunertarlugu.

Imm. 3. Borgmesterip suliaq ataatsimiititaliap suliassaqrata iluani suliaasoq unitsissinnaavaa, ataatsimiititaliarlu peqqullugu suliaq kinguarsarneqarani kommunalbestyrelsimut saqqummiunneqassasoq. Tamannali atuutinngilaq ataatsimiititaliami aalajangiiffigineqartartussatut inatsisitigut aalajangersaavigineqarsimasumi.

§ 21. Kommunip illunik pisineranut tunisineranut, taarsigassarsineranut aammalu qularnaveeqquusiisutut imminut pisussanngortinneri pillugit pappiaqqat borgmesterimit imaluunniit borgmesterip tullianit aammalu inummit kommunalbestyrelsimit piginnaatinneqartumit atsiorneqartassapput.

§ 22. Suliassat inatsit manna kommunimilu aqutsinermi malittarisassat naapertorlugit borgmesterimut isumagissanngortinneqartut borgmesterip pisinnaannginnerani borgmesterip tullia kingoraartaagallarnerni isumagisarilissavai.

Imm. 2. Borgmesterip tullia kommunalbestyrelsimiit pisussaatinneqarsinnaavoq borgmesterimut paarlattanissaminut, nalilernerqarpat borgmesteri periarfissaqassanngitsoq akisussaaffimminik minnerpaamik qaammatip ulluini 21-ni ingerlatsinissaminut.

§ 23. Borgmesteri inatsit una naapertorlugu imaluunniit kommunimi aqutsinermut ileqqoreqqusaq imaluunniit suleriaasissamut maleruaqqusaq naapertorlugit suliassaminik pisussaaffigisaminik suliaqarnissaminut itigartitsippat kommunalbestyrelsip borgmesterip tullia peqqusinnaavaa suliassamik pineqartumik isumaginissasoq.

Imm. 2. Borgmesterip imm. 1-imi suliassanik pineqartunik suliaqarnissaminut ingasattumik arlaleriarluniluunniit ilaginnaaneratigut kommunalbestyrelsip borgmesterip tullia borgmesteriugallartussatut ivertissinnaavaa. Borgmesterip tullia suliassat borgmesterip suliai tamaasa tigussavai.

Imm. 3. Kommunilbestyrelsip borgmesterip suliunnaarsinnissaanik aalajangernera ingerlaannartumik Kommunit nakkutilliisoqarfiannut nalunaarutigineqassaaq, akuersissutigisassanngorlugu. Aalajangerneq aatsaat atuutilissaaq Nakkutilliisoqarfimmiit atortussanngortinneqareeruni.

Imm. 4. Aalajangerneq imm. 3 naapertorlugu ingerlanneqartoq eqqartuussivinnut suliaassanngortinneqarsinnaanngilaq.

Kapitali 4

Ataatsimiititaliat il.il.

Aningaasaqarnermut ataatsimiititaliaq

§ 24. Kommunimi suliaasaatit isumagineqarnissaat siunertaralugu kommunalbestyrelsi aningaasaqarnermut ataatsimiititaliamik pilersitsissaaq.

Imm. 2. Borgmesteri aningaasaqarnermut ataatsimiititaliami siulittaasuuvog. Ilaasortat sinneri kommunalbestyrelsimi ilaasortat akornannit qinerneqassapput.

Imm. 3. Aningaasaqarnermut ataatsimiititaliami ilaasortat akunnattumik amerlassuseqassapput aamma kommunalbestyrelsimi ilaasortat affaat qaangersimassanngilaat. Ilaasortanut tamanut, taamaallaat borgmesteri pinnagu, sinniisussanik qinersisoqassaaq, taakkualu ilaasortaasut najuussinnaannginneranni ataatsimeeqataasinnaanngorlugit ataatsimiigiaqquneqartassapput.

Imm. 4. Aningaasaqarnermut ataatsimiititaliami ilaasortassanik qinersisoqartassaaq borgmesterimik borgmesterillu tullianik (borgmesterip tulliinik) qinersisoqareernerani. Qinigaaneq kommunalbestyrelsip piffissamut qinigaaffianut atuuppoq.

§ 25. Aningaasaqarnermut ataatsimiititaliap suliaasai tassaapput:

1) Kommunip iluani suliaasaqarfinni tamani aningaasaqarnikkut allaffissornikkullu ingerlatsinermi nakkutilliisuuneq. Suliani taakkunani aningaasaqarnermut ataatsimiititaliap oqaaseqaataa piumaneqartassaaq, suliap kommunalbestyrelsimut aalajangiiffisassanngorlugu saqqummiunneqannginnerani.

2) Akissarsianut sulisoqarnermullu tunngasuni suliaasanik tamakkiisumik isumaginninneq, tassunga ilaallutik kommunimi sulisorisanik atorfnititsisarneq soraarsitsisarnerlu, taamaallaat kommunaldirektørimik atorfnititsisarneq soraarsitsisarnerlu pinnagit, suliaq taanna kommunalbestyrelsimut isumagineqartussaammat.

3) Suliat kommunip aningaasaqarneranut naatsorsuuserineranullu attuumassuteqartut.

4) Aningaasaqarneq pillugu ingerlatsinermut atatillugu tunngaviusussanik maleruagassiorneq, ataatsimiititaliat ataavartut kommunalbestyrelsimut inassuteqartarneranni pituttuisumik maleruarneqartussaasunik, aamma

5) aningaasaqarnermut ataatsimiititaliap isumagissavaa ataqatigiissaassalluguluunniit kommunip immikkoortunut pilersaarusiornera, ataatsimut atorneqartussanik pilersaarusiornermut maleruagassiornermigut paasissutissallu qanoq annertussuseqarnissaannut aalajangersaanermigut.

Imm. 2. Aningaasaqarnermut ataatsimiititaliap aamma kommunip ingerlatsiviisa allat aqunneqarnerat isumagisarissinnaavaa. Kommunip ingerlatsiviisa allat aqunneqarnerannik aningaasaqarnermut ataatsimiititaliaq isumaginnittuussappat, aqutsinermut maleruagassani aalajangersarneqarsinnaavog aningaasaqarnermut ataatsimiititaliaq suliaasut naapertorlugit taaguuteqartinneqassasoq.

Imm. 3. Kommunilbestyrelsimi ilaasortat aningaasaqarnermut ataatsimiititaliami ilaasortaangitsut pisinnaatitaapput ataatsimiititaliap ukiumut pilersaarusiorfusumut missingersuusiorfusunullu aningaasartuutissanut missingersuusiasa inaarutaasumik suliarineqarneranni oqaaseqarsinnaanatik peqataanissaminnut.

Ataatsimiititaliat ataavartut

§ 26. Kommunalbestyrelsi aammattaaq ataatsimiititalianik ataavartunik pilersitsisinnaavoq, taakkualu katitigaanissaat suliassaallu aqutsinermut ileqqoreqqusami aalajangersarneqassaaq.

Imm. 2. Ataatsimiititaliani ataavartuni ilaasortat kommunalbestyrelsimi ilaasortat akornanniit qinerneqartassapput aamma akunnattumik amerlassuseqassallutik, kommunalbestyrelsillu ilaasortaasa affaanit amerlanerusinnaanatik. Ataatsimiititaliani ataavartuni ilaasortanut tamanut sinniisussamik qinersisoqartassaaq, taakkualu ilaasortaasup najuussinnaannginneranni ataatsimiititaliami ataatsimeeqataasinnaanngorlugit ataatsimiigiaqquneqartassapput.

Imm. 3. Ataatsimiititalianut ataavartunut ilaasortassanik qinersineq aningaasaqarnermut ataatsimiititaliamik qinersereernerup kingorna ingerlanneqartassaaq. Qinigaaneq kommunalbestyrelsip piffissamut qinigaaffianut atuuppoq.

§ 27. Ataatsimiititaliat siulittaasussatik namminneq qinertassavaat. Ataatsimiititaliami ilaasortaq kinaluunniit pisussaavoq siulittaasutut qinigaanini akuerissallugu. Ataatsimiititaliami siulittaasup ataatsimiititaliap ataatsimiinnissai piareersartassavai, ataatsimiigiaqqusisassalluni ataatsimiinnerit siulersortassallugit ataatsimiinnernilu aalajangiinerit aalajangiinernut imaqarniliamut allanneqarnissaat akisussaaffigallugu.

Imm. 2. Siulittaasup ataatsimiititaliaq sinnerlugu suliassat kinguartinneqarsinnaanngitsut imaluunniit nalornisoorutaasinnaanngitsut aalajangiivigisinnaavai. Suliassani inatsisiliornikkut ataatsimiititaliamut suliassanngortitaasimanngitsuni kinguartinneqarsinnaanngitsunili ataatsimiititaliami siulittaasup aalajangiitinnani borgmesteri ilisimatittassavaa, tamannali atuutinngilaq suliassani ataatsimiititaliamut suliassanngortinneqarsimasuni.

Imm. 3. Ataatsimiititaliami ilaasortap kialuunniit siulittaasup sulinera pillugu apeqqutit suugaluartulluunniit ataatsimiititaliamut suliassanngortissinnaavai, siulittaasullu ataatsimiititaliaq nassuiaatinik piumasaanik nalunaarfigissavaa. Siulittaasoq sutigut tamatigut ataatsimiititaliap aalajangiinerinut maleruuttussaavoq.

§ 28. Ataatsimiititaliat ataavartut sulinertik ataatsimiinnerminni ingerlattassavaat. Ataatsimiititaliat ataavartut aalajangiisinnaassuseqartarput ilaasortat minnerpaamik affaat ataatsimiinnermi peqataagaangata. Ataatsimiititaliat ataavartut ilaasortamit piumasaqartoqarnera tunngavigalugu aalajangersinnaapput ilaasortaq tele aqqutigalugu attaveqatigiinnikkut atortorissaarutit iluaqutigalugit ataatsimeeqataasinnaasoq.

Imm. 2. Ataatsimiititaliat ataavartut sulinerminni suleriaasissatut maleruagassartik namminneq aalajangersartarpaat.

Imm. 3. Aalajangiinernut imaqarniliat § 16 naapertorlugu ataatsimiititaliat ataavartut sulineranni malinneqassapput. Ataatsimiititaliani ataavartuni siulittaasut isumannaartassavaat aalajangiinernut imaqarniliat ataatsimeeqataasunit atsiorneqartarnissaat, Naalakkersuisunullu nassiunneqarnissaat.

Imm. 4. Ataatsimiititaliat ataavartut akuerisinnaavaat kommunimi atorfeqartut ataatsimiinnerni najuussinnaanerat ataatsimiititaliap ataavartup allaffissornikkut sullinneqarnera isumagineqarsinnaaqqullugu. Ataatsimiititaliani ataavartuni aalajangerneqarsinnaavoq inuit allat, tassunga ilanngullugit kommunalbestyrelsimi ilaasortat ataatsimiititaliap isumaqatigiinniarnerni alaatsinaattuusinnaasut, tamanna kissaatigineqarpat suliap ersarissaavigineqarnissaanut atatillugu.

Imm. 5. Kommunalbestyrelsimi ilaasortaq kinaluunniit, nipangiussisimasussaataaneq pillugu

inatsisiliornikkut maleruagassat killissarititaat killigalugit, qinnuteqareernermigut pisinnaatitaavoq oqaluuserisassat allattorsimaffinik aamma aalajangiinernut imaqarniliat allattorsimaffinik ataatsimiititaliani ilaasortaaffiginngisaraluamini ilaasortanut nassiunneqartartunik, aammalu qinnuteqareernikkut ataasiakkaatigut suliassanut tunngasunik ataatsimiititaliami ilaasortanut nassiunneqartut assigisaannik nassinneqarnissaminut.

§ 29. Ataatsimiititaliat ataavartut siulersugassaraat imminnut suliassiissutigineqartut ukiumoortumik aningaasanut missingersuusiap akuerineqarsimasup iluani aammalu kommunalbestyrelsip akuersissutigisimasai allat naapertorlugit. Ataatsimiititaliat ataavartut aningaasat akuerineqarsimasut atuinermit nikingannginnissaat nakkutigissavaat aammalu aningaasaqarnermut ataatsimiititaliaq aqqutigalugu kommunalbestyrelsimut siunnersuuteqassallutik aningaasat ilassutissatut akuersissutissat kissaatiginartutut pisariaqartutulluunniit isumaqarfiginarpata.

Imm. 2. Iliuissat ataatsimiititaliamut allamut annertuumik pingaaruteqartut aallartinneqannginneranni ataatsimiititaliap ataavartup pisariaqartitsineq tunngavigalugu borgmesteri akuutillugu, tak. § 20, imm. 2, ataatsimiititaliaq pineqartoq isumaqatiginiassavaa.

Imm. 3. Ataatsimiititaliat ataavartut aningaasaqarnermut ataatsimiititaliamit piumaffigineqarlutik ataatsimiititaliallu taassuma piffissaliussaata iluani ukiumoortumik aningaasanut missingersuusiassamut aammalu ukiunut tuliiinut arlalinnut aningaasanut missingersuusiata ilanngutassatik saqqummiutissavaat.

§ 30. Ataatsimiititaliami ilaasortap kialuunniit aalajangiinerup piviusunngortinneqarnissaa unitsissinnaavaa ataatsimiinnermi oqaaseqaruni suliassap kommunalbestyrelsimut tamarmiusumut saqqummiunneqarnissaa kissaatigigini. Tamannali atussanngilaq aalajangiinernut inatsisit malillugit ataatsimiititalianut ataavartunut isumagisassanngortinneqartunut.

Ataatsimiititaliat, isumalioqatigiissitat il.il

§ 31. Ataatsimiititalianut, isumalioqatigiissitanut, siulersuisunut taamaaqataannullu kommunalbestyrelsip aalajangersakkat allat naapertorlugit sinniisoqarfigisassanut ilaasortassat kommunalbestyrelsip qinissavai.

Imm. 2. Ataatsimiititalianut il.il. ilaasortassanik qinersineq ataatsimiititalianut ataavartunut qinersinerup kingorna ingerlanneqartassaaq. Qinersineq piffissamut kommunalbestyrelsip qinigaaffianut atuutissaaq.

Imm. 3. Aammattaq kommunalbestyrelsi ataatsimiititalianik immikkut ittunik pilersitsisinnaavoq suliassat aalajangersimasut isumagineqarnissaannut imaluunniit kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartussanik. Kommunalbestyrelsip aalajangissavai ataatsimiititaliat immikkut ittut katitigaanissaat taakkulu sulinissaat pillugit maleruagassat aalajangersassallugit.

Imm. 4. Kommunalbestyrelsi aalajangersinnaavoq kommunalbestyrelsimut ilaasortaannngitsunik toqqaassalluni tamanna inatsimmi allami immikkut ittumik periarfissatut akuerineqarsimappat, aammalu suliassat allat kommunalbestyrelsip akuersineratigut suliareqquneqartut.

Ataatsimut aalajangersakkat

§ 32. Kommunalbestyrelsi §§-ini 24 aamma 25 killiliussat iluanni aqutsinermut maleruagassami aalajangersaasinnaapput ataatsimiititaliaqarnermiit allaanerusemumik aqutseriaaseqarnissamik.

§ 33. Kommunalbestyrelsi ataatsimiititaliat pillugit iluseqartitsinermut allannngortiterinermut atatillugu aalajangiisinnaavoq:

- 1) ataatsimiititalianik ataavartunik pilersitsissalluni imaluunniit atorunnaarsitsissalluni,
- 2) ataatsimiititaliap ataaavartup ilaasortaasa amerlassusii allanngortinneqassasut imaluunniit
- 3) ataatsimiititaliat ataavartut akornanni suliasat agguataarnerat allanngortinneqassasut.

Imm. 2. Ataatsimiititaliat pillugit iluseqartitsinermit allanngortiterinerit imm. 1-imi taaneqartutut ingerlanneqassapput kommunip aqutsinissamik ileqqoreqqusaata allanngortinneqarnissaa pillugu § 1, imm. 2-mi maleruagassat malillugit.

Imm. 3. Kommunalbestyrelsimi ilaasortap ataatsip piumasaqaatigippagu aningaasaqarnermut ataatsimiititaliami aamma ataatsimiititaliani ataavartuni tamani inissitsiteqqittoqassaaq.

§ 34. Kommunalbestyrelsimi ilaasortat pisussaapput ataatsimiititalianut qinigaanitik akuerissallugit, takuuk §§ 24, 26 aamma § 31, aammalu suliasat allat kommunalbestyrelsip akuersineratigut suliareqquneqartut.

§ 35. Ataatsimiititalianut il.il. ilaasortassanik marlunnik amerlanerusunilluunniit qinersinermi qanoq amerlassuseqarneq tunngavigalugu qinersineq atorneqassaaq ataatsimiititalianut tamanut.

Imm. 2. Ataatsimiititalianut il.il. borgmesterip pinngitsoorani ilaasortaaffigisassaanut ilaasortassanik qinersinermi borgmesterip inunnguuseralugu inigisaa inissanut qanoq amerlassuseqarneq tunngavigalugu kommunalbestyrelsimi suleqatigiit borgmesterip ataffigisaata pisassaanut ilanngullugu naatsorsuutigineqartassaaq.

Imm. 3. Ataatsimiititalianut il.il. ilaasortassanik kommunalbestyrelsimi ilaasortat ilaasortaannngitsullu akornanni qinersisoqassagaangat ilaasortat kommunalbestyrelsip toqqagassai tamarmik qinerneqassapput qanoq amerlassuseqarneq tunngavigalugu ataatsimiititalianut tamanut. Suleqatigiit ilaasortaataqartussat tulleriiaarlutik kommunalbestyrelsimi ilaasortat ilaasortaannngitsullu toqqartussavaat inissat tamarmiusut inuttalerneqarnissaasa tungaanut.

Imm. 4. Qanoq amerlassuseqarneq tunngavigalugu qinersineq ingerlanneqassaaq d'Hondtip periaasia tunngavigalugu imaattunik malittarisaaqarluni: Kommunalbestyrelsip ilaasortai immikkoortunut qinersinissami pineqartumi qanoq taaseqatigiikkumanertik pillugu siulittaasumut nalunaarsimanertik tunngavigalugu avinneqassapput. Suleqatigiit tamarmik amerlassusii 1-imik, 2-mik, 3-mik il.il. agguarneqassapput. Inernerit pissarsiarineqartut aalajangissavaat qanoq tulleriinneqarlutik sinniisorisassaminnik qinersisinnaanersut. Inernerit marluk amerlanerusulluunniit assigiippata qanoq tulleriinneqarnissaaq makitsinikkut aalajangerneqassaaq. Suleqatigiit ataasiakkaat sinniisorisassaasa amerlassusissaat aalajangerneqarpat suleqatigiit piaartumik borgmesterimut nalunaarutigissavaat inuit kikkut inissani pisassaminni toqqarneqarnersut. Suleqatigiit arlaata ataatsimik arlalinnilluunniit inuttaliisinnaatitaanini atorumanngippagu inissat inuttalerneqannngitsut suleqatigiit allat akunneranni agguarneqassapput periaaseq siuliani taaneqartoq malillugu.

§ 36. Amerlanerussuteqartitsilluni qinersinermi qinigassanngortittoq ilaasortanit najuuttunit amerlanerpaanit taaneqartoq qinigaassaaq. Qinigassanngortittuni amerlanerussuteqartoqannngippat qinersisoqaaqissaaq. Qinersinermi tassani aamma amerlanerussuteqartoqannngippat, pingajussaanik qinersisisoqassaaq, amerlanerpaanik taaneqartut marluk akornanni. Taasinerit amerlaqatigiippata makitsinikkut aalajangiineqassaaq.

Imm. 2. Kommunimi sulilersussamik atorfnitsitsinermi qinnuteqartut arlallit akornanni toqqaasoqartassaaq periaaseq imm. 1-imi taaneqartoq malillugu.

§ 37. Piffissap qinigaaffiup ingerlanerani ataatsimiititaliami taamaaqataaniluunniit ilaasortaq tunuarpat kommunalbestyrelsimilu suleqatigiinnit aalajangersimasunit qinerneqarsimappat inissaaq inueruttoq

suleqatigiinnit taakkunannga inuttalerneqassaaq.

Imm. 2. Ataatsimiititaliami ilaasortaq najuussinnaanngippat suleqatigiit ilaasortamik qinersisimasut aalajangersinnaapput ilaasortap sinniisussaa, tak. § 15, imm. 2, ataatsimiititaliami ilaasortaagallassasoq ilaasortap najuuteqqilernissaata tunngaanut.

§ 38. Ataatsimiititaliamit aalajangerneqartassaaq ilaasortaq imatut soqutigisaqarnerseq, ilaasortaq ataatsimiititaliap suliamik suliarinninnerani peqataasinnaanani.

Imm. 2. Ilaasortap ataatsimiititaliami siulittaasoq ilisimatittassavaa pissutissaqarpat suliani aalajangersimasuni suleqataasinnaanerminut apeqquingortitsisinnaasunik.

Imm. 3. Ilaasortap suliamut aalajangersimasumut sammitillugu suleqataasinnaanera apeqquernerneqarsinnaasorineqarpat kommunalbestyrelsimut gruppe-mi qinigaaqatigisimasaani ilaasortat, aammalu ilaasortaq kisimiilluni qinigaasimasuuppat, suleqataasinnaanera apeqquernerneqartup nammineq sinniisussamik ataatsimiititaliap sulineranut aggersaasoqarnissaanik piumasaqarsinnaavoq.

Imm. 4. Ataatsimiititaliaq ilaasortap suleqataasinnaannginneranik aalajangiippat, sinniisussamik aggersaasoqarsimanngitsoq, taava kommunalbestyrelsimi ilaasortat pineqartup qinigaaqatigisimasaasa, aamma pineqartut kisimiilluni qinigaasimappat, ilaasortaq nammineq, piumasaqarsinnaapput suliaq tulliani ataatsimiinnissamut kinguartinneqassasoq. Kinguartitsisinnaanerli periarfissaqassanngilaq kinguartitsinerup kingunerissappagu piffissaliussat kommunip pisussaaffigisaasa eqqortinneqarsinnaannginnerat.

§ 39. Ataatsimiititaliami ilaasortaq kommunimi ingerlatsivimmik ataatsimiititaliamit pineqartumit qullersaaffigineqartumik akissarsiaqaatigalugu sulissussissanngilaq, tamanna sioqqullugu tamanut ammasumik suliariumannittussarsiuussisoqareersinnagu imaluunniit pissutsit immikkut ittut pissutigalugit kommunalbestyrelsi aalajangiisimappat.

Imm. 2. Ataatsimiititaliami ataavartumi ilaasortaaneq ajornarpoq:

- 1) ataatsimiititaliamut ataavartumut ingerlatsivimmi pineqartumi akisussaasutut aqutsisuusumut taakkualu tullersortaannut, aamma
- 2) allatut allaffissornikkut akisussaaffittaartumik ingerlatsivimmi aqutsisuusunut, ataatsimiititaliap ataavartup ataaniittumi.

Imm. 3. Aningaasaqarnermut ataatsimiititaliami ilaasortaaneq ajornarpoq atorfilinnut:

- 1) kommunip ingerlatsiviani allaffissornikkut suliassaqaqarfinnik § 25 aamma kapitali 5 naapertorlugu aningaasaqarnermut ataatsimiititaliap ataani inissisimasunut,
- 2) akisussaasutut imaluunniit allatut pisortaasutut ingerlatsivimmi inissisimagaanni, aningaasaqarnermut ataatsimiititaliamut attuumassuteqartuni, aamma/imaluunniit
- 3) ingerlatsivimmi ingerlatsisuusunut akisussaasutut pisortaagaanni, ataatsimiititaliat ataavartut ataanni.

Imm. 4. Kinaluunniit kommunalbestyrelsimi atorfeqartitaasumut katissimallugu imaluunniit katissimanngikkaluarlugu inooqateqartumut aappaasoq ilaasortaasinnaanngilaq

- 1) ataatsimiititaliami ataavartumi, atorfeqartoq imm. 2 naapertorlugu ataatsimiititaliami ataavartumi ilaasortaasinnaanngippat, aamma/imaluunniit
- 2) aningaasaqarnermut ataatsimiititaliami, atorfeqartoq toqqaannartumik akisussaasuuppat imaluunniit pisortaaqataappat ingerlatsivimmi aningaasaqarnermut ataatsimiititaliamut imaluunniit ataatsimiititaliamut ataavartumut attuumassuteqartumi.

Kapitali 5

Kommunip aningaasanut tunngasutigut ingerlatsinera

Ukiunut missingersuutit allallu

§ 40. Kommunip ukioq naatsorsuiffia tassaavoq qaammatisiutit malillugit ukioq.

§ 41. Aningaasaqarnermut ataatsimiititaliap kommunip ukiumoortumik aningaasartuutissanut missingersuutai kommunalbestyrelsimut ingerlatinneqartussat suliarissavai. Siunnersuutit ukiunut tulliuuttunut minnerpaamik pingasunut missingersuusianik imaqaassapput.

Imm. 2. Ukiumoortumik aningaasartuutissanut missingersuusiani ilaatinneqassapput kommunip isertitassai aningaasartuutissaalu tamarmiusut aammalu aningaasat tigorianaanaat nikerarnerat aamma aningaasaatit nikerarneri.

Imm. 3. Ukiumoortumik aningaasartuutissanut missingersuusiaq aningaasartuutissatut isertitassatullu aamma nikerartussanut allanut ilimagineqartunut tamatigut takussutissaassaaq.

Imm. 4. Ukiumoortumik aningaasartuutissanut missingersuusiami naatsorsuutigineqassanngilaq taarsigassarsinissaq, attartornissaq imaluunniit pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsinissaq, tamanna Naalakkersuisunit imaluunniit kommunalbestyrelsimut maleruagassat atuuttut naapertorlugit siumoortumik Naalakkersuisunit akuerineqareersimalluni taarsigassarsinissaq, attartornissaq imaluunniit pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsinissaq Naalakkersuisut akuersiteqqaartinnagit pisinnaanngilaq.

Imm. 5. Aningaasanut missingersuusioarnissamut aamma aningaasanut ilassutitut akuersissuteqarnissamut maleruagassat Naalakkersuisut aalajangersarsinnaavaat.

§ 42. Aningaasaqarnermut ataatsimiititaliap ukiumoortumik missingersuusiai aammalu ukiunut arlalinnut aningaasanut missingersuutai kommunalbestyrelsimi marloriarlugit suliarineqassapput sivikinnerpaamik sapaatip akunnerinik marlunnik akuttussuseqartumik.

Imm. 2. Aningaasanut ukiumoortumik missingersuutit aammalu ukiunut arlalinnut missingersuutaasut marloriarlugu oqaluuserineqarnissaani periaasissat erseqqinnerusut suleriaasissami kommunalbestyrelsip aalajangersassavai.

Imm. 3. Ukiumoortumik aningaasanut missingersuusiap aappassaaneerlugu oqaluuserineqarnissaanut piffissaliussaq Naalakkersuisut aalajangissavaat, aammalu ukiumoortumik aningaasanut missingersuusiap inaarutaasumik akuersissutigineqarnissaani aningaasaliissutit akuersissutigisassat immikkoortitaaneri pillugit maleruagassanik aalajangersaasinnaallutik.

Imm. 4. Kingusinnerpaamik ukiumoortumik aningaasartuutissanut missingersuutit akuersissutigineqarneraniit ullut 14-it qaangiutinnginneranni assinga Naalakkersuisunut nassiuuneqassapput.

§ 43. Ukiumoortumik aningaasartuutissanut missingersuut ukiunullu tulliuuttunut arlalinnut aningaasartuutissanut pilersaarutit akuersissutigineqarnerminniit ullut 14-it qaangiutsinnagit kommunimi innuttaasunit takuneqarsinnaalissapput.

Imm. 2. Ukiumoortumik aningaasartuutissanut missingersuusiap ukiunullu tulliuuttunut arlalinnut aningaasartuutissanut missingersuutit imarisaannut naatsumik nassuiaat ukiup naatsorsuiffiup tulliuuttup aallartinnginnerani kommunimi innuttaasunut saqqummiunneqassaaq imaluunniit najugaqarfimmi tusagassiutitigut saqqummiunneqassalluni kommunalbestyrelsip aalajangigaa naapertorlugu.

§ 44. Aningaasartuutissat isertitassallu ukiumoortumik aningaasartuutissanut missingersuutiniittut kommunalbestyrelsip missingersuutininik pineqartunik akuersissuteqarnerminni aalajangiiffigisaat, § 42, imm. 3 naapertorlugu kommunip ingerlatsiviinut pituttuisuupput.

Imm. 2. Aningaasanik akuersissuteqartartuuneq kommunalbestyrelsimiippoq. Suliniutit aningaasartuuteqarnermik isertitaqarnermilluunniit kinguneqarsinnaasut, ukiumoortumilli missingersuusiani ilaatinneqanngitsut aallartinneqarsinnaanngillat, kommunalbestyrelsi aningaasartuutissanik akuersissuteqareertinnagu. Iliuusissalli inatsit, peqqussutit imaluunniit inatsisitigut aalajangersakkat allat naapertorlugit pisussaaffusut allatut ajornaraangat kommunalbestyrelsi akuerisimanngisaanik aallartinneqarsinnaapput, kisiannili piaarnerpaamik akuersissuteqartoqarnissaa isumagineqassaaq. Kommunalbestyrelsillu aammattaaq aningaasaqarnermut ataatsimiititaliaq pisinnaatissinnaavaa ingerlatsinermi aningaasartuutissanik missingersuutiniittunik nikisiterisinnaanermut kiisalu sanaartugassanut aningaasaliissutinik sanaartugassanut allanut nuussisinnaanermik.

Imm. 3. Ilasutitut aningaasaliissutaasut tamarmik paasissutissanik imaqassapput aningaasartuutissap akuersissutigineqartup suminngaaniit akilernerqarnissaanik, aammalu ukiunut missingersuusiorfusunut kinguneqartussaansersoq ilanngullugu nassuiarneqassaaq. § 42, imm. 3 aamma ilasutitut aningaasaliissuteqarnermi malinneqartassaaq.

§ 45. Naalakkersuisut maleruagassiorsinnaapput kommunit:

- 1) taarsigassarsisinnaaneranngit allanillu akiligassanik pisussaaffilersorsinnaanerannut,
- 2) qularnaveeqquisiinnaanerannut allanillu pisussaaffilersinnaanerannut,
- 3) attartornissamut isumaqatigiissuteqarsinnaanerannut aammalu pigisamik ukiumoortumik akiliuteqartarnikkut atuisinnaatitaalluni pigileriartrorneqartussamik pissarsinissamik isumaqatigiissutinik pilersitsisinnaaneranngit aamma/imaluunniit,
- 4) kommunit inatsit malillugu pisussaaffiginngisaminnik aalajangersimasumik akiliisarnissaminngit imaluunniit assingusunik neriorsuuteqarsinnaanerannut.

Naatsorsuusiorneq naatsorsuutillu

§ 46. Kommunip naatsorsuutaani nalunaarsorneqassapput kommunip aningaasaatai qanoq aqunneqarsimanersut aammalu aqunneqarnerat ukiumoortumik aningaasanut missingersuusianut kommunalbestyrelsillu aalajangiinerinut allanut naapertuuttuunersut.

Imm. 2. Kommunip aningaasaatai isumannaatsumik paarineqassapput. Aningaasat ullormut atrorneqartussatut tigorianaatanneqanngitsut aningaaserivimmut ikineqassapput imaluunniit obligationinut aningaasaliinermiluunniit uppersaatinut inissinneqassallutik aningaasaateqarfiit aningaasaataannik inissiiffigineqarsinnaasunut.

§ 47. Kommunip naatsorsuutai aningaasaqarnermut ataatsimiititaliamit kommunalbestyrelsimut saqqummiunneqassapput. Naatsorsuutit ilaqartinneqassapput:

- 1) kommunip qularnaveeqqusiinerinut, attartornerinut, pigisamik ukiumoortumik akiliuteqartarnikkut atuisinnaatitaalluni pigileriartrorneqartussamik pissarsinerinut aamma akiliussisussamaataanermik nalunaarutaasa nalunaarsorneqarnerat,
- 2) pisariaqartitsineq naapertorlugu pissutsit qanoq ittuunerannut nassuiaatit, minnerunngitsumik aningaasaliissutaasut naatsorsuutaasullu nikingassuteqarneranni, aamma
- 3) kommunip sanaartugassanut aningaasaliissutaanut pissusiviusut pillugit nassuiaatit, ukiunullu missingersuusiorfusunut il.il.

Imm. 2. Kommunalbestyrelsip naatsorsuutini nassuiaatit isummerfigissavai aammalu naatsorsuutini immikkuualuttunut malinnaatitsilluni iliuuseqartoqassanersoq, tamatumalu kingorna naatsorsuutit kommunalbestyrelsip kukkunersuiisunut Naalakkersuisunullu ingerlatissavai.

Imm. 3. Naalakkersuisut naatsorsuutit qanoq suliarineqarlutillu saqqummiunneqarnissaat pillugit maleruagassiussapput.

§ 48. Kukkunersuiisup oqaaseqaatai aningaasaqarnermut ataatsimiititaliamut nalunaarutigineqassaapput. Aningaasaqarnermut ataatsimiititaliaq ingerlatsivinnit aningaasaqarnermut ataatsimiititaliap toqqaannartumik ataaniinngitsunit akissuteqaatinik piumasaqassaaq. Akissuteqaatit aningaasaqarnermut ataatsimiititaliap kommunalbestyrelsimut inassuteqaataani ataatsimoortuni ilaatinneqassapput. Kommunalbestyrelsip alajangiiffigissavaa ukiumoortumik naatsorsuutitut oqaaseqaataasut akissuteqarfigineqarnissaat aammalu ukiumoortumik naatsorsuutit akuersissutigineqarnissaat.

Imm. 2. Kommunalbestyrelsi aalajangeereerpat, tak. imm.1, aalajangiineq kukkunersuiisut oqaaseqaataat ilanngullugit Naalakkersuisunut nassiunneqassapput.

Imm. 3. Kingusinnerpaamik ullut 14-it qaangiunneranni ukiumoortumik naatsorsuutit akuerineqarnerannit, naatsorsuutit innuttaasunit pineqarsinnaassapput.

§ 49. Kommunit tamarmik akuerisaasunik kukkunersuiisoqassapput kukkunersuisut inatsisaat atuuttoq tunngavigalugu, Naalakkersuisunit akuerineqartumit. Kommunalbestyrelsip akuerisaasunik kukkunersuiisoq asoortippagu tamanna Naalakkersuisut akuereqqaartussaagaat piumasaavoq.

Imm. 2. Naatsorsuutini kukkunersuienermi kommunalbestyrelsip susassaarfii tamaasa ilaatinneqassapput. Kukkunersuiinermi misissorneqassapput

- 1) naatsorsuutit pissusiviusunik ersersitsinersut,
- 2) naatsorsuutit saqqummiunnerini atuineq ukununga naapertuuttoq:
 - a) aningaasaliissutitut akuersissutigineqartut,
 - b) kommunalbestyrelsip aalajangerneritut allanut,
 - c) inatsisinut aamma maleruagassanut allanut,
 - d) isumaqatigiissutaasimasunut aamma
 - e) ileqquusunik nalinginnaasunik ingerlaatsimut.

Imm. 3. Kukkunersuiisut pisinnaatitaapput sukkulluunniit sioqqutilluni ilisimatitseqqaaratik karsi misissussallugu, akuttunngitsunillu kommunip naatsorsuutaanik misissuisassallutik, tassani ilanngullugit nakkutilliinermut aqqissuussinerit taassunga ilanngullugit qarasaasiat atornissaannut maleruagassat takusinnaajumallugu aarlerinangitsumik ingerlasoqarnersoq.

Imm. 4. Kommunalbestyrelsi pisussaavoq paasissutissat kukkunersuiinermi pisariaqartut pissarsiarissallugit kukkunersuiisunullu nalunaarutigissallugit.

Imm. 5. § 48, imm. 1 aamma 2-mi aalajangersakkat aamma taamatulli atortinneqassapput kukkunersuiisut nalunaarutaanni, suliarineqartuni imm. 3-mi aalajangersakkat naapertorlugit.

§ 50. Kommunip karseqarneranik aamma naatsorsuuserinermik ingerlatsineranik aqqissuussineq suliallu ingerlasarnerat pillugit kommunalbestyrelsi maleruagassiussaaq, malittarisassiatut ilusilerlugu suliarineqartumik. Malittarisassiaq kommunip kukkunersuiisutitut nassiunneqassaaq, taakkualu allannguutini atulersitsinnginnermi tamatigit ilisimatinneqartassapput.

Imm. 2. Kommunip karseqarneranut naatsorsuteqarneranullu aqutsinissaaq, kukkunersuiinissaaq aammalu kukkunersuiisut oqaaseqaataasa aalajangiivigineqarnissaat pillugit maleruagassanik Naalakkersuisut aalajangersaasinnaapput.

Kapitali 6

Nunaqarfinni aqutsisut

§ 51. Nunaqarfinni aqutsisussanik ataatsimoorussanik minnerpaamik kommunip iluani nunaqarfiit marluk peqataaffigisaannik qinersisoqartassaaq. Kommunalbestyrelsip aalajangersassavaa nunaqarfiit sorliit ataatsimoorussassaminnik aqutsisoqartinneqassanersut, aammalu pingasunik tallimanilluunniit ilaasortaqaassanersut. Aalajangerneq pissaaq ukioq nunaqarfinni aqutsisunik ataatsimoorussanik qinersiviusussaq sioqqullugu, ukiup naannginnerani.

Imm. 2. Naalakkersuisut pisuni immikkut ittuni imm. 1, oqaaseqatigiit aappaanni aalajangersakkamik sanioqquitsinissamut immikkut akuersissuteqarsinnaapput, nunaqarfiit avinngarusimasumiittut imaluunniit innuttaqortuut eqqarsaatigalugit. Naalakkersuisut aalajangerniarnerminni oqimaalutarisinnaavaat kommunalbestyrelsit pineqartut nunaqarfinni aqutsisussanik ataatsimoorussanik aalajangersaarneminni qanoq nunaqarfinnik aqutsinikkut katiterisimanerat, nunaqarfiit minnerpaamik marlukkaarissaat eqqarsaatigalugu.

Imm. 3. Inissitsiterfiusumik ataatsimiinnermi siulliullugu Nunaqarfinni aqutsisut akunnerminni siulittaasussaminnik qinersissapput. Nunaqarfimmi aqutsisut siulittaasuat piffissamut nunaqarfinni aqutsisut qinigaaffiannut qinnerneqartassaaq.

Imm. 4. Nunaqarfinni suliasat aqunneqassapput nunaqarfinni aqutsisunit kommunalbestyrelsiniiit pisinnaatitsineq tunngavigalugu, aammalu qinnerneqartassallutik kommunalbestyrelsinut nunaqarfinni aqutsisunut ilagiillu sinniisaannut qinersisarnermut inatsisartut inatsisaat tunngavigalugu.

§ 52. Nunaqarfimmi aqutsisut sulinissaannut maleruagassat nunaqarfimmut aqutsisut suleriaasissaat kommunalbestyrelsimiit aalajangersarneqassapput. Maleruagassat kapitali 2-mi aalajangersarneqartut ukununga tunngasut saneqqunneqarsinnaanngillat

- 1) allaganngorlugit imaqarnilianik suliaqartussaarnermut pisussaaffeqarneq,
- 2) suliani aalajangersimasuni attuumassuteqarneq pissutigalugu peqataasinnaannginneq, aamma/imaluunniit,
- 3) imaqarniliani ikinnerussuteqartutut oqaaseqaateqarsinnaatitaaneq.

Imm. 2. Kinaluunniit nunaqarfiup allaffiani atorfeqartoq nunaqarfimmi aqutsisunut ilaasortaasinnaanngilaq.

Imm. 3. Nunaqarfimmi aqutsisunut ilaasortaasup kialuunniit suliaq ingerlasoq unitsissinnaavaa, ataatsimiinnermi nalunaarutigalugu suliaq pineqartoq kommunalbestyrelsimut imaluunniit kommunimi ataatsimiititaliamut nunaqarfimmi aqutsisut sinnerlugu sullitaannut suliaq saqqummiunneqartussanngortillugu.

§ 53. Nunaqarfimmi pissutsinut tunngasut pillugit nunaqarfimmi aqutsisut kommunalbestyrelsimut inassuteqarsinnaapput. Kommunalbestyrelsip sapinngisamik nunaqarfiup suliaminnut tunngasunut pillugit nunaqarfimmi aqutsisut oqartussaaffigeriinngisaminni apequtini oqaaseqartinneqartassapput.

§ 54. Kommunalbestyrelsimiit aningaasaliissutaareersimanngitsunik nunaqarfimmi aqutsisut aningaasartuuteqarsinnaanngillat.

Imm. 2. Kommunalbestyrelsi aningaasanut missingersuusiani aningaasanik immikkoortitsisinnaavoq nunaqarfimmi aqutsisut nammineerlutik aalajangiinnerminni atugassaanik makkunani:

- 1) Kulturimut inunnillu paasisitsiniaanermut
- 2) Timersornermut tunngasunut

- 3) Teknikkikkut ingerlatsivinnut pilersuinnermullu
- 4) Nunaqarfimmi inuutissarsiutinut tunngasunik suliniutinut
- 5) Isumaginninnermi suliaasanut.

Imm. 3. Aningaasat atugassanngortinneqarsimasut qanoq atorneqarsimanerannut takussutissatut nunaqarfimmi aqutsisut kommunalbestyrelsimut nassiuttassavai ikinnerpaamik qaammammut ataasiarluni akiligassanut, bankimut karsimullu pappiaqqat, aningaasat qanoq atorneqarsimanerannut uppersaaitut.

§ 55. Nunaqarfimmi aqutsisut siulittaasuata nakkutigissavaa nunaqarfiup suliaasaatai inatsisit aammalu nunaqarfimmi siulersuisut suleriaasaat naapertorlugit ingerlanneqarnersut.

Imm. 2. Kommunalbestyrelsip nakkutigissavaa nunaqarfimmi aqutsisut ingerlatsinerminni malittarisassat inatsimmi matumani pisortallu ingerlatsinerannut maleruagassani allani allassimasut naapertorlugit ingerlatsinerat.

§ 56. Kommunalbestyrelsip nunaqarfimmi aqutsisunut ilaasortat akissarsiaqartissavai Naalakkersuisut § 66, imm. 6 naapertorlugu aalajangersagaasa annerpaaffissaatitaasut iluanni.

Imm. 2. Kommunalbestyrelsip aalajangersinnaavaa nunaqarfimmi aqutsisut siulittaasui ilassutitut aningaasarsiaqartinniarlugit.

Imm. 3. Naartunermi, erninnermi meeravissartaarnermilu Inatsisartut inatsisaat naapertorlugu nunaqarfimmi aqutsisut akissarsiaminik annaasaqaataanngitsumik sulinngiffeqarsinnaatitaapput.

Kapitali 7

Nakkutilliineq

§ 57. Naalakkersuisut nakkutigissavaat kommunalbestyrelsit ingerlatsinerminni inatsimmi matumani maleruagassat malinneraat, aammalu pisortani maleruagassat atuuttut naapertorlugit ingerlatsinersut.

Imm. 2. Naalakkersuisut nakkutilliissanngillat immikkut maalaaruteqartarfiit nakkutilliisuutitallu aalajangiiffigisinnaasaanni suliaasuni.

Imm. 3. Naalakkersuisut nakkutilliissanngillat atorfinittisarnermut maleruagaasunik eqqortitsisoqarnersoq pillugu.

§ 58. Kommunalbestyrelsip isumagissavaa Naalakkersuisunullu nalunaarutigalugu kommunimut tunngatillugu paasissutissat Naalakkersuisut piumasaasa ingerlatinneqartarnissaat.

Imm. 2. Naalakkersuisut kommunalbestyrelsi pisussaatisinnaavaat nassuiaatinik kukkunersuiisuniit kommunalbestyrelsip aalajangigaat kukkunersuiisut nalunaarutaat pillugit pissarsiniaqqullugit.

Imm. 3. Naalakkersuisut piffissaliisnaapput imm. 1 aamma imm. 2 naapertorlugu paasissutissat pissarsiarineqarnissaannut tunngatillugu.

Imm. 4. Naalakkersuisut nakkutilliisutut sulinnerminnut atatillugu, sulinnermi pappilissanik tigusaqarunik, pisortat ingerlatsineranni suliaasat suliarineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat naapertorlugit nipangiussimaneqartussat isigineqartunik, taava pappilissat pineqartut ingerlateqqinneqarnerisigut isertuussaajunnaarsinneqassanngillat.

Imm. 5. Naalakkersuisut pisortat ingerlatsivii allat piumaffigisinnaavaat suliaasaqarfimmi iluini siunnersuillutillu ikiuteqqullugit, nakkutilliinerup naammassiniarneranut pisariaqartumik.

§ 59. Naalakkersuisut aalajangissavaat naammattumik tunngavissaqarnersoq suliaap Nakkutilliisoqarfimmut ingerlateqqinnissaanut.

Nakkutilliisoqarfik

§ 60. Nakkutilliisoqarfimmi ilaasortaapput:

- 1) Kalaallit Nunaanni Nunap eqqartuussisuunerata Nakkutilliisoqarfiup siulittaasuani taassumalu ataatsimik arlalinnilluunniit tullissaaniq toqqaassaaq, tamarmillu inatsisilerituutut soraarummeersimasuussapput.
- 2) Ilaasortat marluk Inatsisartunit Inatsisartunut qinersisoqareernerit tamaasa toqqarneqartussat.
- 3) Ilaasortat marluk Kalaallit Nunaanni Kommunit Kattuffianit kommuninut qinersisoqareernerit tamaasa kommunalbestyrelsinut ilaasortanngortut akornanni qinerneqartussat.

Imm. 2. Ilaasortat tamarmik minnerpaamik ataatsimik sinnisussaqaassapput, ataatsimiigiaqqullugit aggersarneqarsinnaasunik ilaasortaasup pisinnaannginnerani.

§ 61. Nakkutilliisoqarfik ataatsimiittassaaq siulittaasup imaluunniit ilaasortat pingasut pisariaqartitsinerat tunngavigalugu.

Imm. 2. Siulittaasup qaqugukkut sumilu ataatsimiittoqarnissaa aalajangertassavaa ilaasortallu ataatsimiigiaqqullugit.

Imm. 3. Siulittaasup ataatsimiinnissat sioqqullugit sapinngisamik annertunerpaamik ilaasortat ataatsimiinnermi oqaluuserisassat pillugit ilisimatittassavai.

Imm. 4. Siulittaasup Nakkutilliisoqarfiup ataatsimiinneri siulersortassavai, isumagissallugulu aalajangikkat imaqarniliamut allanneqarnissaat, ataatsimeereermilu ilaasortanit ataatsimeeqataasunit imaqarniliap atsiorneqarnissaa. Ilaasortat tamarmik pisinnaatitaapput allaanerumsumik isummernitik imaqarniliamut nalunaarsortissallugit.

§ 62. Nakkutilliisoqarfik aalajangiisinnaatitaavoq minnerpaamik siulittaasup saniatigut ilaasortat marluk ataatsimiinnermi najuuppata.

Imm. 2. Aalajangerneerit amerlanerussuteqarneq atorineqassaaq. Taasinnermi taasisut naligiippata, siulittaasup taasinera aalajangiisuussaaq. Nakkutilliisoqarfimmi ilaasortat tamarmik pisinnaatitaapput aalajangerneerit unitsissinnaallugit, imaqarniliamullu allatsillugu suliaq Naalakkersuisunut aalajangiiffisassanngorlugu ingerlateqqinneqassasoq.

Imm. 3. Ilaasortaqaq Nakkutilliisoqarfiup isumaqatigiinniarnerni taasinernilu peqataasinnaanngilaq, suliaq kommunimut ilaasortap ilaasortaaffigisaanut tunngasuuppat.

§ 63. Siulittaasup Nakkutilliisoqarfiup aalajangigaasa piviusunngortinneqarnissaat isumagissavaa.

Siulittaasup Nakkutilliisoqarfik sinnerlugu suliasat kinguartinneqarsinnaanngitsut imaluunniit nalorninaateqanngitsut aalajangiiffisinnavaa.

Imm. 2. Siulittaasup aalajangiineri ataatsimiinnermi tullermi Nakkutilliisoqarfimmut saqqummiunneqassapput.

Imm. 3. Naalakkersuisut Nakkutilliisoqarfiup allattoqarfeqarnissaa isumagissavaat.

§ 64. Nakkutilliisoqarfiup sulineranut atasumik aningaasartuutit Nunatta karsianit akilerneqassapput.

§ 65. Nakkutilliisoqarfiup kommunalbestyrelsip, aningaasaqarnermut ataatsimiititaliap taakkualuunniit ilaasortaasa aammalu ataatsimiititaliat ataavartut taakkualuunniit ilaasortaasa aalajangigaat atorunnaarsissinnaavaat, aalajangerneq inatsisinut unioqqutitsineruppat.

Imm. 2. Suliaq suliarinerani aalajangerneq Nakkutilliisoqarfiup atorunnaarsikkallarsinnaavaa.

Aalajangerneerli piviusunngortinneqareersimappat, taava taanna taamaallaat atorunnaarsikkallarneqarsinnaavoq

- 1) suliami susassaqtartup arlaata Nakkutilliisoqarfimmut allakkatigut piumasaqaateqarneratigut mianerisassallu annertuut, pingaartumik inuttut soqutigisat tamatumunnga akerliusumik aporfuunngippata, imaluunniit
- 2) inatsisiliornerup allatigut maalaaruteqarnissaq periarfissaqartinngippagu mianerisassallu annertuut, pingaartumik inuttut soqutigisat tamatumunnga akerliusumik aporfuunngippata.

Kapitali 8

Akissarsiat

§ 66. Kommunalbestyrelsimi ilaasortanut aalajangersimasumik akissarsiaqartitsisoqartassaaq. Ilaasortat akissarsiaannut ilaapput

- 1) kommunalbestyrelsip ataatsimiinnerini peqataanermut kommunalbestyrelsimilu ataatsimiititaliani ataatsimiinnernut taakkulu ataani ataatsimiititaliani ataatsimiinnerni peqataanerit,
- 2) kommunalbestyrelsinut qinersereernerup kingorna kommunip sullinneranut atasunut ataatsimiinnernut, allanik aalajangersakkanik immikkut tunngaveqartumik akissarsiaqartitsisoqanngippat,
- 3) pikkorissarnermut peqataanermut, kommunalbestyrelsimi imaluunniit aningaasaqarnermut ataatsimiititaliamit kommunalbestyrelsimiit pisinnaatinneqarneq naapertorlugu sulinermut pingaaruteqartutut isigineqartuni, imm. 1 aamma imm. 2-mi suliat pineqartut tunngavigalugit,
- 4) isumasioqatigiinnernut peqataanermut,
- 5) kukkunersuiusut nalunaarutaata saqqummiunneqarnerani peqataanernut,
- 6) kommunalbestyrelsimi imaluunniit ataatsimiititalianiit piumaffigineqarnerit tunngavigalugit kommunimi sulianik ingerlatsinerit aamma
- 7) suliaqarnerit allat imm. 1-imiit 6-imut ataatsimiinnerit il.il.

Imm. 2. Kommunalbestyrelsip aalajangersinnaavaa kommunimi ataatsimiititaliani ataavartuni siulittaasunut ilassutitut akissarsiaqartitsinissaq.

Imm. 3. Kommunalbestyrelsimi ilaasortamut sinniisutut isertoq aalajangersimasumik akissarsiaqartinneqassaaq piffissami kommunalbestyrelsimi suliffigisamini piffissaq pineqartoq minnerpaamik qaammatinik marlunnik sivilissuseqarsimappat. Assigisaanillu ilaasortaajunnaarallartup akissarsiai ilanngarneqassapput, piffissaq pineqartoq minnerpaamik qaammatinik marlunnik sivilissuseqarpat.

Imm. 4. Kommunalbestyrelsimi ilaasortaq minnerpaamik qaammatinik marlunnik sivilissusilimmik ataatsimiititaliami ataavartumi siulittaasuugallartoq ilassutitut akissarsiaqartinneqassaaq imm. 2 naapertorlugu. Assigisaanillu ataatsimiititaliami siulittaasuujunnaarallartup ilassutitut akissarsiai ilanngaatinneqassapput, ataatsimiititaliami siulittaasoq pineqartoq qaammatit marluk sinnerlugit peqanngittussaappat.

Imm. 5. Kommunimi qinikkatut sulinermut atatillugu Naalakkersuisunit aalajangersakkat naapertorlugit angalanernut najugaqarnernullu ajunngitsorsiaqartitsisoqarsinnaavoq angerlarsimaffimmiit qimagusimasariaqartarnermut matussutaasunik.

Imm. 6. Naalakkersuisut aalajangersimasunik akissarsiassaasunik, ilassutitut akissarsianut, ullormusiat, akissarsianut annaasanut taartisiassat taakkualu tunniunneqartarnerat missingersuusiorneqartarnerallu pillugit maleruagassiorsinnaapput.

Imm. 7. Kinaluunniit aningaasarsiassanik kajumissaatisianillu il.il. imm. 1-imiit 5-imut pineqartunik tigusinissaminut pisussaavoq.

Imm. 8. Naartunermi, erninermi meeravissiaartaarnermilu Inatsisartut inatsisaat naapertorlugu, kommunalbestyrelsini ilaasortat akissarsiaminik annaasaqaataanngitsumik sulinnigiffeqarsinnaatitaapput.

§ 67. Naalakkersuisut maleruagassiussapput:

1) Borgmesterinut akissarsiaqartitsineq, soraarnerussutisiat aamma borgmesteritut suliunnaarnermi aningaasarsiassat pillugit.

2) Borgmesterit tulersortaanut imaluunniit kommunalbestyrelsimi ilaasortanut borgmesterip peqannginnerani paarlattaasunut akissarsiarititassat pillugit.

Imm. 2. Kommunalbestyrelsip Nakkutilliisoqarfimmit akuerineqarluni aalajangersinnaavaa pissutsit § 23, imm. 1 aamma 2-mi pineqartut tunngavigalugit borgmesterip akissarsiassai apparneqassasut imaluunniit atorunnaarsinneqassasut.

Imm. 3. Kommunalbestyrelsi borgmesterip piumasaqarneratigut eqqartuussiviit aqutugalugit suliassanngortitsinnaavoq imm. 2 naapertorlugu aalajangerup misilinneqarfigisassaanik.

§ 68. Kommunimi sulisut nalinginnaasumik akissarsiaqartitaanerinut, atorfeqartitaanerinut, soraarnerussutisiaqartitaanerinullu aalajangersakkat, tjenestemandit pillugit inatsisini tamakku aalajangersarneqarsimatinnaq, Naalakkersuisut aamma Kalaallit Nunaanni Kommunit Kattuffiata akunneranni isumaqatigiissutit aqutugalugit imaluunniit isumaqatigiissuteqareernerisigut aalajangersarneqassapput.

§ 69. Nakkutilliisoqarfimmi ilaasortat akissarsiaqartinneqassapput Inatsisartuni Naalakkersuisunilu ilaasortat akissarsiaqartinneqartarnerannut Inatsisartut inatsisaat naapertorlugu.

Kapitali 9

Iliusereriikkanut kinguneqartitsinerit taarsiissuteqarnerillu

§ 70. Kommunalbestyrelsi inatsisit naapertorlugit pisussaaffimminik naammassinninngippat, Nakkutilliisoqarfup kommunalbestyrelsimi ilaasortat ataasiakkaat pisunut akisussaasut pinngitsaaliissutinik akilersuisussanngortissinnaavai.

Imm. 2. Nakkutilliisoqarfik kommunalbestyrelsimut ilaasortamut taarsiissuteqarnissamik piumasaqaateqarsinnaavoq, kommunip annaasaqarluni ajunaaruteqarneranut akisussaasuuppat.

Imm. 3. Nakkutilliisoqarfup suliassanngortitsinini utertissinnaavaa, ilaasortaq pineqartoq piffissaliussap aalajangersimasup iluani aningaasanik aalajangersimasunik kommunimut akiliippat. Akiliutaasussap aalajangersarneqarnerani pisuussuttip annertussusia, ajoqusiinerup annertussusia pissutsillu allat mianeralugit tunngavigineqarsinnaapput. Ilasortaq akiliisussaanini akuerippagu aammalu piffissaliussap iluani akiliutaasussaq akilerlugu, taava allatigut pineqartumut taarsiissuteqartoqarnissaanik piumasaqartoqarsinnaanngilaq.

Imm. 4. Ilasortaq taasinngitsoornermigut akisussaaffimminik qimarratiginnissinnaanngilaq.

§ 71. Kommunalbestyrelsimut ilaasortaq taarsiissuteqartoqarnissaanik suliartoqarnerani annaasaqarluni ajunaarutinut taarsiissuteqartussatut akisussaatinneqarpat, kommunimit sulissussinermini piliarisimasaminik, taarsiissutissap annertussusissaa naapertuuttumik annikillineqarsinnaavoq imaluunniit atorunnaarsinneqarsinnaavoq, pisuussuseqarneq, ajoqusiinerup annertussusia pissutsillu allat mianerineqartussat tunngavigalugit.

§ 72. Kommunalbestyrelsimut ilaasortaq kommunalbestyrelsimi ilaasortatut pisussaaffimminik sakkortuumik sanioqqutitsisoq pinngitsaaliissummik akiliisussanngortinneqarsinnaavoq.

Imm. 2. Assuarliut imm. 1 naapertorlugu pisoq taamaallaat Nakkutilliisoqarfiup piumasaqarneratigut pisinnaavoq.

Kapitali 10

Atortuulersitsinermut aalajangersakkat

§ 73. Inatsisartut inatsisaat atortuulerpoq ulloq 1. januar 2011.

Imm. 2. Peqatigisaanik kommunit aqunneqarnerat pillugu Inatsisartut inatsisaat nr. 14, 5. december 2008-meersoq atorunnaarsinneqarpoq.

Imm. 3. Nalunaarutit kommunit aqunneqarnerat pillugu Inatsisartut inatsisaannik atuuttuni tunngaveqartut atuutiinnassapput matumani inatsimmi allanngortinneqarnissamik imaluunniit atorunnaarsinneqarnissamik tungaannut.

Kalaallit Nunaanni Namminersorlutik Oqartussat, ulloq 18. november 2010

Kuupik Kleist

/

Anthon Frederiksen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut